

KONFERENCIJA : „ZVONO ZA PROMJENE“
Sarajevo, 02.02.2016. godine

INICIJATIVA
ZA UBRZANJE PROCESA IZGRADNJE FUNKCIONALNOG DIJALOGA
VIJEĆA MINISTARA BiH SA CIVILNIM DRUŠTVOM

Učesnici Konferencije „Zvono za promjene“, održane 2.2.2016. godine u Sarajevu - predstavnici nevladinih organizacija, akademske zajednice, medija, poslovnih udruženja, profesionalnih, stručnih udruženja i drugih organizacija civilnog društva iz Bosne i Hercegovine, pokreću i Vijeću ministara BiH prosljeđuju ovu civilnu inicijativu.

Cilj inicijative je da se „otkoči“ trenutni zastoj u procesu izgradnje institucionalnog i pravnog okvira za razvoj funkcionalnog dijaloga Vijeća ministara BiH sa zainteresovanim nevladinim organizacijama (NVO) i drugim organizacijama civilnog društva (OCD) u skladu sa političkim i ustavno-pravnim uređenjem BiH. Neposredna svrha inicijative je da se izvrši organizovan i artikulisan pritisak civilnog društva (CD) na Vijeće ministara BiH da u najkraćem roku preduzme sve neophodne mjere i korake koji će stvoriti uslove za implementaciju „Sporazuma o saradnji između Vijeća ministara BiH i NVO sektora u BiH“ (Sporazum) iz 2007. godine.

1. IZRAŽAVAMO spremnost da zajedno sa drugim zainteresovanim bh. OCD preuzmemo svoj dio odgovornosti i pružimo vlastiti doprinos uspješnom nastavku ovog procesa.
2. U realizaciji ove inicijative SPREMNI SMO aktivno sarađivati sa Vijećem ministara BiH i drugim bh. institucijama, uz puno poštovanje međunarodno priznatih standarda, principa i dobre prakse u odnosima između države i CD, uključujući principe samostalnosti, nepristrasnosti i nezavisnosti OCD, uzajamnog priznavanja i uvažavanja mjesta i uloge u društvu, slobode pristupa informacijama, otvorenosti i transparentnosti u radu, partnerstva i uzajamnosti.
Opredjeljenje za kooperativni pristup u nastavku procesa izgradnje međusektorskog dijaloga na razini BiH, ne isključuje pravo NVO i drugih OCD da budu korektiv vlasti i da aktivno zagovaraju javne politike u skladu sa svojom misijom i ciljevima djelovanja.
3. SAGLASNI SMO da kratkoročni prioriteti ove inicijative u 2016. godini budu sljedeća pitanja:
 - a) Nastavak kampanje zagovaranja za hitno provođenje mjera i koraka nedavno preduzetih od strane Vijeće ministara BiH za izradu i usvajanje novog, revidiranog Sporazuma, koji će biti praktično provodiv i prihvatljiv za sve njegove glavne aktere.

U vezi s tim, TRAŽIMO od Vijeća ministara BiH da u ovaj proces uključi predstavnike zainteresovane javnosti i OCD, bilo kroz članstvo u sastavu odgovarajućih radnih tijela, ili pak kroz široke konsultacije u procesu izrade novog Sporazuma, a prije njegovog upućivanja u proceduru za konačno usvajanje.

- b) Osnivanje (i) Ureda/Kancelarije za saradnju sa CD (Ured/Kancelarija), i (ii) Savjeta za razvoj CD (Savjet), kao stručnog, odnosno savjetodavnog tijela Vijeća ministara BiH za pitanja saradnje i razvoja CD iz okvira nadležnosti i odgovornosti Vijeća ministara.

TRAŽIMO od Vijeća ministara da preduzme neophodne korake i mjere koje će u najkraćem roku omogućiti formiranje ovih tijela. OČEKUJEMO od Vijeća ministara da pri izboru optimalnog modela za njihovo formiranje uzme u obzir preporuke i prijedloge OCD, te različitih programa i projekata tehničke podrške Vijeću ministara u izgradnji funkcionalnog dijaloga sa CD, kao i dobru praksu u ovoj oblasti iz zemalja iz bližeg i daljeg okruženja.

TRAŽIMO od Ministarstva finansija i trezora BiH da preispita svoj stav u vezi sa formiranjem Ureda/Kancelarije za saradnju sa CD „ ... da (je) stvaranje stalnog tijela Vijeća ministara u statusu budžetskog korisnika, a u kontekstu ograničenog fiskalnog okvira, preuranjeno i sa ekonomskog aspekta neracionalno, te se predlaže preispitivanje odluke u skladu sa navedenim“¹.

Uz puno razumijevanje „ograničenog fiskalnog okvira“, smatramo da sredstva za ovu namjenu postoje i da se mogu pronaći kroz odgovarajuću reorganizaciju, te kroz preraspodjelu raspoloživih budžetskih sredstava i ljudskih resursa.

4. POZIVAMO vlade RS, FBiH i Brčko Distrikta, kao i vlade kantona i organe lokalne samouprave, da u saradnji sa OCD donesu vlastite sporazume, ili slične strateške dokumente, u kojima će shodno svojim specifičnim okolnostima, ustavnim i zakonskim nadležnostima i odgovornostima, utvrditi osnovne principe i oblasti saradnje sa CD, u skladu sa međunarodno priznatim standardima, principima i dobrom praksom u odnosima između države i CD.
5. TRAŽIMO od Ministarstva pravde BiH, kao resornog ministarstva Vijeća ministara BiH odgovornog za provođenje „Pravila o konsultacijama u izradi pravnih propisa“ Vijeća ministara (Pravila), da preduzme dodatne mjere i korake koji će omogućiti dosljednu primjenu Pravila u procesu donošenja odluka i kreiranja javnih politika iz okvira nadležnosti Vijeća ministara i drugih bh. institucija.

Aktivno uključivanje svih segmenata bh. javnosti i OCD u procese kreiranja, provođenja, monitoringa i analize efekata zakona i drugih instrumenata javnih politika može značajno doprinijeti efikasnosti i kvalitetu ovog procesa, posebno u svjetlu integracije BiH u Evropsku uniju (EU). Ovo, utoliko prije što je dijalog države i CD u ovoj oblasti *de facto* politički kriterij za punopravno članstvo u EU.

POZIVAMO Vijeće ministara i druge bh. institucije da uvažavaju i adekvatno vrednuju potencijalni doprinos koji aktivno učešće javnosti i OCD može dati u podizanju kvalitete i efikasnosti javnih politika, posebno sa stanovišta inovativnih rješenja i njihovog značaja za životne probleme građana i bh. društva, te efikasne primjene i (pro) ocjene njihovih stvarnih efekata.

TRAŽIMO od Ministarstva pravde BiH, kao resornog ministarstva odgovornog za provođenje Pravila, da u godišnjem budžetu planira i osigura sredstva za njihovo dosljedno provođenje u praksu u skladu sa dodijeljenim poslovima i zadacima u ovoj oblasti. Isto važi i za sve druge bh. institucije koje su obavezne provoditi Pravila. To bi bio jedan od načina da konsultacije u procesu izrade propisa prestanu biti samo projektna aktivnost u klasičnom, donatorskom smislu te riječi (kakav je slučaj danas), već da postane dugoročno održiva praksa i dio institucionalne kulture Vijeća ministara BiH i drugih bh. institucija u procesu donošenja odluka i kreiranja javnih politika.

6. POZIVAMO strane i međunarodne, vladine i nevladine organizacije, agencije i fondacije da kroz svoje projekte i programe tehničke podrške nastave podržavati razvoj funkcionalnog dijaloga Vijeća ministara sa CD, uključujući izgradnju tehničkih i institucionalnih kapaciteta oba sektora u ovoj oblasti, pri tome promovisući princip da su domaće institucije vlasti i OCD glavni akteri u ovom procesu i kao takvi najodgovorniji za njegov uspjeh.
7. U cilju jačanja svojih kapaciteta za veće i kompetentnije učešće u procesu kreiranja i provođenja javnih politika Vijeća ministara i drugih bh. institucija, IZRAŽAVAMO spremnost da radimo na unapređenju međusobne saradnje kroz sektorsko umrežavanje i zajednički, organizovani nastup prema Vijeću ministara i drugim bh. institucijama u predlaganju, monitoringu i evaluaciji sektorskih politika od značaja za naše članove i korisnike čije interese i potrebe predstavljamo i zagovaramo.

¹ Mišljenje Ministarstva finansija i trezora BiH br. 05-02-2-5033-2/12 od 16.07.2012.godine, upućeno Ministarstvu pravde BiH

8. U cilju povećanja vlastitog ugleda kao kredibilnog i pouzdanog partnera vladinim institucijama, **PREUZIMAMO OBAVEZU** da radimo na izradi i uvođenju Etičkog kodeksa i standarda kvaliteta za OCD, sa krajnjim ciljem promocije i poštovanja osnovnih principa i vrijednosti civilnog društva u svakodnevnom radu i djelovanju OCD, uključujući dijalog i saradnju sa institucijama vlasti, te osiguranje kvaliteta usluga OCD.

Kako bi se svim drugim zainteresovanim NVO i OCD širom BiH, koje nisu imale priliku učestvovati na konferenciji „Zvono za promjene“, omogućilo da podrže ovu inicijativu, Centar za promociju civilnog društva (CPCD) će organizovati potpisivanje on-line peticije za podršku ovom dokumentu.

Učesnici konferencije „Zvono za promjene“

Sarajevo, 02.02.2016. godine